

**Ulloq 1. januar 2015 aallarnerfigalugu ukiuni tulliuttuni sisamani KNR-mut aningaasaliissutit qaffannissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aningaasaliissutit ilassutaat tusagassiortut immikkut qaqilerilluni radiomi, tv-mi qarasaasiamilu nutaarsiassalerinermut taamaallaat atorpeqassapput.**

(Inatsisartunut ilaasortaq Andreas Uldum, Demokraatit)

### **Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

### **Siullermeerneqarnera**

Naalakkersuisuniit siunnersuummut qujavugut, Nunatsinnilu ingerlalluartunik arlaannaannulluunniit attuumassuteqanngitsunik tusagassiuuteqarnissap pingaartuunera isumaqatigilluinnarlugu.

Kisianni arlaannaannulluunniit attuumannginnerup aamma nassataraa Naalakkersuisut KNR-ip nassitsisarnera akuleruffigisinnaanngimmassuk aningaasaliissutit ilaasa tusagassiormi siunertanut aalajangersimasunut atorpeqarnissaasa aalajangiutereernerisigut. KNR-ip nammineq kisimi aningaasaliissutit ilaasa immikkut suliniutinut pineqartunut immikkoortinnissaat aalajangiussinnaavaa.

Aammattaaq KNR-imut AI 2014-imi ukiunilu missingersuusiorfiusuini aningaasaliissutit 3 mio. kr-nik qaffanneqarnikuupput, tassami KNR init nuuffigigallartariaqartut attartornerinut ingerlatsinermut aningaasaliissutitigut akiliuteqartartussaavoq. 3 mio. kr-nit pineqartut aningaasanut inatsisip suliarinerani kulturimut tunngasunit nassaarineqarput, taamaalillunilu kulturikkut ingerlatanut allanut annertuumik sunniuteqassaaq, siunertanut siunnersuuteqartup siunnersuutigisaanut aningaasaliiniarluni AIS2015-imiilli sipaarniartoqaqqissappat.

Taamaammat Naalakkersuisut inassutigaat siunnersuut itigartinneqassasoq.